



1. oktober 2019

UKA 2019/153
Aqqalu C.Jerimiassen

Inatsisartut aalajangiiffigisassaattut siunnersuut Naalackersuisut peqquneqarnissaat pillugu sulissutigeqqullugu erngup nukinganik iluaquteqarluni nukissiorfiliornissaq Qasigiannuanut aamma Aasiannut pilersuisussamik, aamma Nuup erngup nukinganik iluaquteqarluni pilersorneqarnerata annertusineqarnissaanik, maleruagassat siunnersuutip aallaqqaataani tunngavilersuutitut nalunaarsorneqartut naapertorlugit aaqqissuunneqartussamik (Immikkoortut A-miit D-mut)

(Inuussutissarsiornermut Nukissiuuteqarnermut Ilisimatusarnermullu Naalackersuisoq)

2030 ila aajunaarakasinngorpoq, naak taamaavinngikkaluortoq, sulinerli isigissagaanni ukiut 11-it sukkasuupilussuarmik ingerlasinnaapput.

Nunarput tamakkerlugu 2030 nallertinnangu nukissiuutinik ataavartunik atuilersimanissamut siunnerfeqarneq unammilligassaavoq imaannangivissortoq.

Atassummiillu taamaattumik Naalackersuisut sapiissuseqarlutik suleriaqqinnerat nunatta nukissiuutinik ataavartunik atuilertiartaartikkiartorneqarnerani sulinerannik nersualaarumavagut.

Ilanggusanilu takuneqarsinnaasumik Nukissiorfiit ersarissaatinneqarsimanerat ajunngilluinnarpoq, tassuunakkummi ersarissitinneqarmat, anorisaatit seqerngullu qinngornerinik sarfaliortitsinissamut nukissaq pilersinneqarsinnaasoq nalorninartumiissinnaasoq.

Ukiuni arlariinni uuliap akia allanngorartarsimaqaaq, ilaatigullu nunarsuarmioqatitta sorsuttuarnerisa aallaavigisaannik akit ilaatigooriarlutik qaffalluinnartarsinnaallutik, tamakkulu assigiinngitsutut toqqammaviit pillugit Atassummiik isumaqarpugut siunissamut eqqanaarinninnerusoq imatut misissuiniarneq.

Kimilluunniit ullumikkut miserratigineqarsinnaangilaq, Nuuk malinnaasinnaangipajaartumik inuttortupiloormat, sineriammiik nussorfigineqarnera imaaginnalivissimammat. Tamannalu soorunami malitseqarportaaq nukissaq pilersinneqartartoq malinnaaniapiluuliertorneranik, malitsigisaanillu naalackersuisut maanna Utoqqarmiut kangerluarsunnguata pitsaangorsaavigineqartariaqarneranik suliaqarnissamik siunnerfeqarnerat pissusissamisuuinnarmat assortoruminaatsoq. Sulilumi suliffeqarfiit Nuummi ineriartortitsinerat ersarissumik ingerlajuartillugu, suliffeqarfiillu namminersortut ingerlalluarnissaannut malinnaatitsiinnassagutta uparuagassartaqanneqaaq atugassarititaasunut qinikkatut sulisuusugut inerisaaqataanissamut aqutissiuigutta.

Taamallu Atassummiik naakkaluamik akissuteqareerluta, aalajangiiffigisassatut siunnersuut akuserseqataaffigaarput.